

達

縣

志

12721

1280-297

42
1-5



Pe83
2320
502.1-

記續修縣志始末

縣舊志成於清嘉慶十九年泊後同光之朝雖有願復初廖季平兩先生續修府志俱未成功而廢候焉革命軍興清廷遜國國體改建共和與專制之政判若霄壤而地方文獻諸事至此成一大段落爲天然界綫使當時博訪周諮一一編纂豈不懿哉顧自民國新建豪傑蓋起以大造時勢風雲倏擾歲無寧日耆老凋喪幾盡檔案銷燬無存欲有以搜集故事勒爲成書以信今而傳後蓋已難矣十二年省會發起續修通志徵集各縣志書於昇邦人君子會集籌商僉謂考獻徵文事體重要然代遠年湮始從事搜采而又在此凋殘之餘斷非一月半年所能成功決議分三期辦理初設籌辦處舉王君郁南爲主任朱君芷蘅伍君聘三副之大凡舉辦一事必以經費爲前提縣中屢經兵燹民生凋敝可謂極矣始由藍燮堯知事捐銀二百圓爲開辦費復議在城鄉團總應得軍費附加一賸五手數料內提銀一千圓於十三年十月成立開辦王君挈領提綱規畫井井先派採訪若干人城廂爲一區五鄉各分區段依照省志體例分門採取時逾一年復派調查員若干就前所採訪者重加考覈并增補遺漏期於詳盡十五年奉省令通志派款以四年爲期縣每年應解銀八百圓委員坐提其時縣志并無專款辦事幾經斷續勢必合省縣兩處統籌的款以利進行此兩全之道也川東襄理辦事處因之照會袁君紫極等八人爲四川通志達縣籌款員而以袁君爲主任繼由籌

辦處函請縣議會統籌款項議決就正糧附加每斗一角卽以是年預徵十七年糧稅爲始而先後採訪調查尙有遷延未報者不得不暫時收束此第一期辦理情形也十七年五月撤籌辦處設局孔廟內兼修志總理縣知事張公延聘王君郁南爲協理德準爲編輯主任朱君芷衡爲編輯校理萬君恩浦趙君俊卿爲編輯員冉君權之爲坐辦調查員開辦之日召集各法團機關人員會議謂與圖務求精詳人物主張斷代其他體例全照通志於是分門課功準任人物藝文朱君任輿地圖經萬君任建置食貨趙君任學校禮俗置繕寫三四人草稿出卽付之清書於無形之中厲催促之意殊僅三月餘而趙君以疾辭去所編學校不過略具粗形而已翌年暑期萬君又以疾辭馴至於亡而所編之建置猶未竣也王君乃屬準將萬趙兩君所編加以修補其未着手之食貨禮俗亦屬準並任之復查通志例成官政一門殿以紀事雜錄自攝管以來一藁十易不敢告勞况合數人之功而責備一身其曠日蓋可知已所幸王君搜羅金石類次科貢甄錄瑩域功與事又各得其半焉朱君每出測繪歷跋涉之辛苦所至或旬餘或匝月而歸歸則檢其藁本默憶其形勢方位必周詳審慎而後納於方幅之中其屬於輿地各目亦以次編輯之尤賴冉君同行調查以補前次之所未備而局內經費遇不接濟之時或省志催解急迫俱由協理及庶務王子猷君息借袁君紫極間亦出名代爲稱貸或向政府商撥別款用資維持無如時局不靖匪警頻聞翠屏一鄉尤甚

拉劫搶掠無間晨夕遠道傳聞者皆有談虎色變之象致朱君欲前往而不能故至十九年冬初稿完成僅闕翠屏一鄉輿圖此第二期辦理情形也先是前數月王協理因病回家調養屢次函請解職局內事則函屬準代爲主辦初以爲王君病愈必當復來詎知堅意辭退不復作出山想矣二十年三月張總理召集各法團機關人員會商第三期辦法衆謂王君堅辭以年高未便強致公推準繼任協理兼總纂一職翠屏鄉輿圖仍請朱君測繪完竣惟出版成書費用浩大鉛印取值昂貴且遠道經理手續繁難設或出版愆期耗款尤巨不如用棗梨木板雇工刊刻或成功較速而費可輕減此項費用卽就此次煙畝捐附加一照其原附加之糧稅除支付省志舊欠及加派一年解款外應以局務完竣停止征收皆曰可議遂定準自維譚陋二長無一曷勝斯任然重以地方文獻事業得與鄉大夫先生考訂商榷寧非天幸於是部署局務力求撙節敦請朱君繼續工作明知翠屏爲匪風素著之鄉其邊境接渠大兩縣伏莽潛滋未敢輕入而縣圖又不能因其艱險致虧一簣之功乃添聘陳叔和君爲測繪幫辦員蓋陳君爲翠屏人熟習其鄉情形正可資爲間諜與朱君相機進行俾完成全縣輿圖其他各門各目從前因懾於匪患採摭過略亦於此次搜補焉夫縣屬山脉水系支分派別最爲繁雜自非親歷者不能道其詳是以輿地門全出於朱君所編訂準則舉各門初稿十數冊章而鈔之句而釐之訛誤者加以考正參錯者詳爲編次有善必錄續聞亦書

以爲省志取材故於行相似者比附而錄入之然無非以前事不忘使後來者有所考
徵而已若謂爲妄希著作則吾豈敢任也爰以二十年冬月開雕二十二年春始蒞其
事輿圖則付之石印合首尾共二十二卷分裝成冊質諸高明以爲何如至自籌辦以
迄結束一切入付賬項自有庶務報銷茲不備書編者識

舊州志知州陳慶門序

丁巳秋余刺達州首稽州乘僉云明季兵荒州志燬燼於今已百年矣余感感慨思欲修墜舉廢而編輯之舉覺在今日爲最難又在今日爲最急何者志必古蹟可尋也舊章可考也老成宿學之士可以諮詢而折證也達自猷賊之後繼以姚譚文物之區變爲頑鈍繁華之地倏爾淒涼今尋其古蹟荒郊蔓草而已考其舊章斷簡殘篇而已不惟老成宿學闕乎罔聞卽求當年族處土著之民亦覺寥落不可多得是以國史之採取檄飭屢下而諮詢無自考證無人余寔幾幾乎無所措手足矣旣又思夫明季至今其年止以百計猶或存什一於千百倘時愈久而事愈湮將併十一而俱泯後之視今當更不如今之視昔矣余一心以懼其難又一心以慮其急難與急兩相值於一時亦交相迫於吾心遂覺編輯之任雖萬難措置而私心實不敢以畏難而自謝爰糾同人力相厥舉列款三十而卽以所採訪者分註其中乃州志甫得草創余又以入覲中止所屬未暇及也已未回任續附三屬於後凡皆尋古蹟於荒郊蔓草不啻積沙以淘金也考舊章於斷簡殘篇無異紉腋以爲裘也議論雖乏老成誤猷卽鮮宿學而芻蕘一得靡不諮詢田野謏聞罔弗折證是牛溲馬溲敗鼓之皮皆可並蓄而待用也凡數越月彙成一篇雖明知缺略尙多不足補助於前日亦抑以約舉大概以備文獻於將來後之君子踵事增修當亦有以諒予之苦衷也爰敘其端付諸梨棗云

舊州志知州宋名立序

粵自九州辨壤職方掌輿地之圖六合同風太史備輜軒之採山陬海濫郭景純猶且釋經郡列州分班孟堅於焉作志既已神州赤縣具有全書凡茲下邑鴻都豈無私乘維東川之繡壤實西蜀之名區鳳嶺嵯峨巴渠蕩潏池名萬頃春申君結客之鄉山號峨城舞陽侯揮戈之地夜月射丁溪之館杜宇啼紅春風鳴丙穴之泉嘉魚漾碧若夫德堪俎豆代產偉人品重璫璋世傳令範著述則韶醴晨露既潤古而雕今風騷則筆參化工亦抽心而呈貌至如編成常璩特標巾幗之芳型傳自更生不減鬚眉之令譽凡斯之類所宜亟收自古以來未之或泯者也然而水流山峙既多陵谷之悲人往風微不少滄桑之感茫茫往蹟隨白日以俱沉渺渺芳徽若朝雲而易散庾開府之集五存五亡杜征西之碑一沈一立或者荒烟鬻屨即指爲玉女之墳斷瓦飄零遂疑夫相臣之閣潭中龍見大都鄒衍之荒唐石上蘭生悉是假師之附會既異聞而異見乃傳信而傳疑更當明祚之將移適逢賊氛之方熾戰馬鳴戛雲亭畔門掩蓬蒿征旗出明月潭前巢無燕雀緣茲典籍幾經灰燼之餘凡彼圖書悉在淪亡之內縱承百年泰運未及旁求遂使一郡章程幾於廢墜前牧恒州陳君者詳爲考核倍極搜羅乃於散佚之餘密恣排編之舉因之裝成龜鼈滿蕭繹之金樓襲以巾箱跨張融之玉海矣余也一麾出守三載專城得覩蕭規時循禹步荷廳晝靜撫此新編棠舍賓稀睠言前志讀

馬遷之史已歎其勤閱陳壽之書或虞其簡日新月異不無踵事而增華目見耳聞惟欲信今而傳後篋中蠹蝕或得諸殘篇斷簡之間碣上苔纏偶拾於蔓草荒煙之際一百五年往事詢黃髮以周知十六萬戶提封展青箱而如見徵文考獻無非方冊之遺顯微闡幽亦寓激揚之意不慚窺豹授以雕鐫敢倣續貂命之剗厠斟酌損益庶有補於前賢博雅宏通請以俟夫來者

舊縣志知縣魯鳳輝序

志之爲言誌也周禮小史掌邦國之志職方列輿地之圖凡夫郡邑之沿革山川之夷險政治之得失文獻之考徵賦稅之盈絀仕宦之爵里俗尚之淳漓物產之豐嗇罔不眉列臚陳以備太史氏輜軒之采邑之有志不綦重乎我國家重熙累洽久道化成雖山陬海澨僻壤奧區無不奇傑挺生英才輩出况達邑在漢爲宕渠名郡代產偉人曷可任其湮沒不傳令人等諸自鄧無譏之憾者哉顧邑自昔分隸無定舊志悉燬於兵乾隆七年刺史陳君始輯州志十二年瑯琊宋君續纂而加詳焉嘉慶元年教匪倡亂徐王二逆煽動州境蔓延於川之東北勾結焚掠自楚及川至陝而勢愈熾三省官兵剿捕羣匪萃於州境達當其衝賴防禦得宜勁旅雲集屹爲重鎮至八年而大功告成逆匪克殲總統制府勒公經略大臣額侯參贊大臣德侯三大帥仰秉廟謨抗拒於叢箐之間窮追於嶮巖之地湯寇保民凡七閱寒暑而後戡定州人之有勇知方同仇殉義較他邑爲尤烈州於嘉慶七年改爲綏定府以達爲附郭邑維時宰斯邑者卽郡太守梅村余公於兵燹甫定之後百務草創日不暇給猶慨邑乘之未備欲爲輯志舉旋以調任中轡歲壬申制府常奏請重修四川通志檄下郡縣徵取志乘以備采擇前令對西郭君實司厥事迫於期限卽倉猝上陳未能周備今春予奉檄權邑事甫入謁而梅村太守即籌款六百緡以重修邑志爲屬予退而考之達邑自乾隆丁卯而後迄今

已六十餘年其間兵燹相尋武功彪炳都人士之効死勿去慷慨捐軀卽里閭婦女並能守節不辱胥知大義顧令其姓氏不傳里居無考泯沒於殘燐蔓草之間亦守土者之所懼也因與二三耆士亟爲蒐羅舊聞採訪軼事舉凡一善可稱一節足錄者無不博採旁搜以備參證未幾而梅村太守檄調雲安兼三司馬來領郡事余編輯志稿甫竣質諸司馬爲釐正之編目之井然秩然俾邑之人覽是編者具知聖天子深仁厚澤休養涵濡衆庶芸生無不鼓腹含哺優游於太平之世服先疇而寧胡考胥沐郵治所貽留卽一二不逞之徒自外生成罔不殄滅而忠貞自効者均已榮加章服旌及里門然後知善無勿錄孽無勿殲亦足化其獷悍之習未始非勸懲之一助也因弁斯語以質諸長民者至博通淹貫則俟諸大雅云

達縣志凡例

志之爲言誌也所以誌一縣之文獻爲信今傳後之書而新志之作又所以補續前功蒐集後進余也承乏三載博采羣書甄錄必覈其實考校務求其是竭思罄力罔辭勞瘁期不負邦人所託得備通志之選惟卷帙浩繁文字蕪雜疵累必多惜工作迫促無暇就有道而正之聊陳指例藉資商榷

一舊志梓行已百餘年矣前人搜采編纂之功彰彰可考茲編新志應從嘉慶之末繼續編輯另成一書與之並行乃查從前舊志散布民間者已百不存一而鐫板又燬不能不原始以訖於茲俾家置一部人人得而披覽或不至數典而忘非敢有薄前人亦因以適合新例也

一舊州志縣志僅有子目而無門類知爲當日奉檄飭修按照頒定之目採錄填報未敢加以改造故示別裁也茲編依現今通志例爲八門類列子目分別部居會萃州縣兩志益以新增而以紀事雜錄殿於後附以邑人殘賸詩文成詩文存一卷每目冠以小序足覘大概

一志與史相表裏也史之體有紀傳表志縣志雖小體無不備如建置輿地官政禮俗食貨學校藝文金石志也而其中間有表焉人物本乎傳紀事類乎紀屬辭比附其義則竊取之矣惟列表之法大都取年經事緯之式要必年代無荒落而後能以簡

馭繁縣中文籍不存以言職官則姓氏佚而任年略以言科舉則榜次疎而貢年缺故不能悉遵成規惟沿習尙閱者原之

一輿地最重圖考舊縣志全圖一篇紕謬錯誤殆不足取茲經朱君芷蘅用準望之法計里開方詳爲測繪全縣繪一總圖五鄉各繪一分圖又五鄉市場交通一圖俾便披覽至於山則析其脈絡水則條其源委市鎮準其位置道里詳其遠近其他關津之交通寨堡之險固疆域之廣狹朱君逐段履勘編次最詳皆可按圖考索一目瞭然惟舊日八景悉屬湊合且分繪成圖尤嫌丹青附會無關治蹟免占篇幅

又城垣一圖係聘請岳池何潤垓君測繪

一職官以縣志體言應以縣爲限而不能旁及其他達自設府改縣以來府縣同城敷政施治各有可紀之實設不附此而傳則姓名事略必歸湮沒且官制變更累代不同者多尤須詳次以爲考古之助故卽廖教授平所編官制全錄存之

一國家政治時有興革所謂物窮則變也而地方事亦因之改易清自變法以後雖國祚不永而縣中一切新政如學校議參會法團之屬皆次第舉行當詳載其變遷以覘進化整理之狀并冀地方羣衆協衷合力進而樹自治之基

一廟祀典禮舊志略而不詳清代雖有會典通行未必家有其書顧欲考秩祀之隆殺與節儀之煩簡非備載之後人將不復識况值因革損益之會尤當詳載以資參考

至廟祠寺觀本可分別去取而其間困難情形已詳小序茲不贅及

一風俗美惡並書所謂史不擇事也夫以十五國之風詩二百年之春秋四千年之史籍不盡紀人事之美者然必共見共聞其習尙足以澆漓社會者巨細畢書使維持地方風化之人有以改造矯正而馴至於善故未便回護刪削亦不敢徇私逞肌致失徵信

一食貨一門詢問考覈不厭詳盡地方民衆生活皆在於斯而休戚之狀態自可得諸想像也第物產尙豐不假外求故逐類臚列非縣屬所有者不書附以製造期有以啓發實業而優裕民生

一人物紀載必以日久論定爲歸此次主張斷代意在徵求實錄俾光簡冊亦借以杜請託息嫌言也然卽現在國體衡之則截至遜清自是天然界綫惟耆壽年逾耄耄雖其人生存皆一體列名舊日各縣志書已成前例其他割股療親取其一行不屬於蓋棺之論故有名必錄不在此限

一人物武功舊志并明末獻賊之亂及清嘉慶教匪之禍至始迄終雜載其間界說不免混淆蓋陳師鞠旅剿逆定叛國家之大計也地方人士起而捍衛鄉里卓著勤勞或從戎出征勳績確有可述者則列入武功而死難死事者則入忠義目同爲縣中人物之一自無疑義至於軍事始末乃大局安危所關地方治亂所係故別爲紀事

一篇俾便省覽

一貞孝節烈關於風化歷代尊崇褒獎具有深意睹現代之新潮亦興廢升降之機苞桑之繫有同嘅也爰據採訪所得分別類列爲之表傳婦女不限於生存此舊日例也惟節烈之婦操行大抵相同本編力除空言專重實事

一藝文舊志別爲典籍一目而以詩賦文章謂之藝文以通志例考之私人著作名爲典籍固非而謂詩文卽藝文亦覺不當茲依范石湖吳郡志康對山武功縣志例凡詩文之有關掌故并可以考證山川形勝及其人行實者均用雙行小註附於本條之下別以各家著述成集者歸入藝文一門其他零篇剩詞無類可歸者則別爲詩文存而以他縣生存人文字附之於後

一災祥他志多列專條蓋祖鄭氏通志祥異之例吾達舊志記載寥寥卽嘉慶以來縣人亦乏筆記末由訪詢難立專篇茲悉殿於紀事之末

一縣志有氏族一門所以辨種族別統系覘盛衰而戶籍之多寡恒與世變相爲乘除是於一縣之中有至大之關係焉况自改革以來民族並重則記載更不可忽無如全縣人戶家譜世牒之未備者居其大半經兵燹而損失者又所在多有祇寥寥十數家報有族譜遺漏孔多礙難編錄惟有附之蓋闕以俟後來增補

一地方公產乃縣人財力所集各成專款以支持要務凡屬縣人應有共同監督保護

之權責惟真象鮮明局外人誰復過問然盈細之數要當知其大概同策進行如教育實業留學津貼之類其款屬於稅收者詳食貨門其置有不動產者隨其節目而表附於後

一全書八門篇幅多寡不一精於校讎之學者亦難進退於其間蓋顯著專條明分義類未可以裁篇別出惟遇篇幅多者則分爲二卷三卷或別爲上中下篇取便省覽而歸整齊

一考古徵今皆非易事自媿無宏通博雅之才而膺編輯纂修之任且書籍不備闕謬孔多正誤補遺是所望於後之來者

中華民國二十二年三月吳德準識

舊州志纂修姓氏

纂修

陳慶門 達州直隸州知州

宋名立 達州直隸州知州

較閱

耿杰 州舉人

採訪

王師賢 貢生

耿烈 貢生

閔彥聖 文生

陳瑋 文生

高奎 文生

閔謙 文生

分校

商元柏 達州州同

黎瑛 達州學正

參訂

俞慶隆 達州吏目

張釗 達州巡檢

舊縣志纂修姓氏

總纂

余永寧 綏定府知府

纂集

郭南英 達縣知縣

補纂

魯鳳輝 達縣知縣

蔡星 達縣知縣

監修

屠祖型 綏定府經歷

余宗洛 綏定府教授

顏宗儉 綏定府訓導

冉夔 達縣訓導

阮如修 達縣訓導

高齊桂 達縣典史

張覲 達縣巡檢

王良佐 達縣典史

校正

劉又向 塾江進士通川書院掌院

纂修

蒲為章 州舉人

魏以裕 州拔貢

楊世榮 縣拔貢

王廷偉 鎮洋貢生

採訪

丁明德 廩生

黃美中

廩生

張射斗

廩生